

“Novac mora ići građanima Mostara, a ne političarima”

Kontinuirano finansiranje Gradske uprave Mostara od strane Elektroprivreda u Federaciji ovisit će o blagovremenoj implementaciji Statuta kojim se ujedinjuje Grad, izjavio je u utorak visoki predstavnik, Paddy Ashdown.

Gradska uprava Mostara se u značajnoj mjeri finansira putem mjesečnih isplata koje dolaze iz Elektroprivreda koje imaju hidroelektrane na teritoriji grada Mostara. Ovaj aranžman proističe iz dvije Odluke koje je visoki predstavnik donio u aprilu 2003. god. kojima su ponovno uvedena ova plaćanja s ciljem sprečavanja finansijskog kolapsa s kojim se tada suočavala gradska uprava. Odluke koje je donio visoki predstavnik u aprilu 2003.god. su važeće samo do kraja aprila ove godine. Ovaj metod finansiranja će se morati okončati kao dio procesa restrukturiranja elektroenergetskog sektora u BiH.

Visoki predstavnik će uskoro morati donijeti odluku u vezi sa time da li da okonča ovaj privremeni aranžman finansiranja u aprilu, ili u aprilu 2005.god. Ukoliko se Statut Grada ne bude implementirao na efikasan način i ukoliko se javna sredstva ne budu na odgovarajući način trošila na građane a ne na birokratski aparat, paralelizme i opstrukcionizam, visoki predstavnik neće biti u mogućnosti da opravda produženje ovog finansiranja za još godinu dana.

“U Mostaru će se postići rješenje, i to na vrijeme kako bi se ispunio uslov za šestomjesečni pripremni period za općinske izbore koji će se održati u oktobru, te u skladu sa jasnom željom velike većine građana Mostara da se njihovim gradom upravlja putem ujedinjene uprave kojom neće dominirati niti jedan narod,” rekao je visoki predstavnik. “Međunarodna zajednica će osigurati da nova gradska uprava ima privremene

finansijske instrumente koji su joj potrebni da bi izvršavala svoje obaveze prema građanima sve do potpune implementacije novog Statuta, te na taj način Gradsku upravu učiniti ekonomičnijom te omogućiti Gradu da u konačnici proširi obim usluga koje pruža. Međutim, ova privremena pomoć će se obezbijediti samo pod uslovom da političari Mostara pokažu da namjeravaju ovaj novac potrošiti na građane, a ne na sebe same."